

擘經室集一一



研經室集

一一

阮元著

中華書局

擘經室四集詩卷三

丁巳

桐廬九里洲、面江背山、梅花三萬餘樹、侍親登岸遍遊、奉命賦詩、

梅花三萬樹、春洲長九里、上接戴山松、下照桐江水、目力所不到、花勢殊未已、雪光晴不落、香海浩無底、詩人誇鄧尉、較此百一爾、卸帆登中洲、漸入深林裏、十圍合抱圓、數丈拔地起、拂帽更礙路、眩轉聊徙倚、四顧無所見、惟見萬花藥、萬花爭向人、一笑親顏喜、

金華夜泊

百里春風滿、羣帆暮色橫、遠山連野燒、淡月下灘聲、塔影自孤直、津頭將二更、千家尚燈火、遲我婺州城、
是日民間
千家設燈

夜至永康縣

四山看野燒、一路入荒榛、石臥頻疑虎、松明遠照人、城關延過客、行李累齊民、爲憶去年好、山陰畫舫春、
枯蒼山雨歌示諸生端木國瑚等

枯蒼之山應天符、粵惟羣仙之所都、軒皇既遠洞天閉、何處尚有仙人間、我來菱嶺疊足望、但見青峯萬

丈矗立東南隅。是時仲春日已炙。陰巖起蟄蛟龍蘇。盤厓百里直到郡。觸石已見雲合膚。一日二日雷車驅。三日四日雨始濡。春城夜聽留滂沛。北天晝看煙模糊。遙知風門天井響。飛瀑濺起萬斛光明珠。穿林度樾散成霧。溼氣沍結松千株。棠溪管溪流並急。箭發不受山縈紆。陽開陰閉復幾日。此時真有羣靈趨。仙臺福地不能到。誰來示我經與圖。却喜甌江水新漲。石門山色迎川途。我行寫此示國瑚。有山不吟毋乃爲腐儒。

題方洪厓溥所藏張南華鵬翬雲溪圖卽用南華元韻

我聞練水城東南。就中小結南華菴。南華散仙據梧坐。濠梁之樂情所諳。玉峯徵君極好事。直欲靜寄軒相探。雲溪之妙不可說。請君拂紙以筆談。溪上白雲四時好。今當初夏猶濃酣。雨晴風軟懶欲臥。橫空大雪堆青嵐。忽然低飛壓茅屋。綠榆翠竹相交參。此時賓主靜無語。惟見毛穎揮毫斲。山中白雲贈陶隱。南方草木歸嵇含。雲溪頗擬范攄宅。若作友議應成三。南華仙才不久駐。徒令和者悲而慙。姚江學士又化去。卷中有邵二雲學士雙簾書屋題句。雙簾想亦傷藍鬚。方君此卷失復得。水隨帆楫山隨驂。屬我長歌韻成疊。渭城欲唱無

何哉。今日扁舟展卷讀。石門波影相吞吐。溪中雲氣不能畫。況有垂瀑飛風潭。

是日同遊石門看瀑布。

遊古永嘉石門觀瀑布

石門新營在江四。非青田。但李太白卽以此屬之謝公。

永嘉謝守弄奇譎。手擘石門山壁裂。侵晨直上青雲梯。一派寒泉迸龍穴。崖頭百丈直如削。逼令泉飛出其缺。當其欲落未落時。衝擊紛披忽三折。坐教破碎飄輕清。不使渾淪成注泄。偶經宿雨更爭來。少得迴風便旁掣。橫入雲氣派將斷。影漏初陽眼尤警。沾衣溼意詭沉陰。撲面清光仰霏屑。何人拍手喝曰奇。若使彼驚少吞吐。到地灑石無喧聲。此石千年洗真潔。澄潭半頃綠光淨。如著一塵卽污襲。老僧新焙春中茶。燒松煮水快一啜。櫻桃蕉漿漫相勝。誰復此時猶內熱。暑天風日諒不到。寒想冰絲半空結。安得誅茅四時住。坐對天紳自怡悅。出山一步一回顧。隔斷青林始忍別。行看雁蕩大龍湫。與此相衡孰奇絕。

自麗水縣放舟至永嘉縣

桃花楊柳背通津。十里溪山捩舵頻。面壁每驚無去路。望烟始識有居人。怒流不怕千回折。窮谷應遲半月春。若使客星逃更遠。此間幽瀨好垂綸。雲徑歸樵忽有歌。數家小屋倚坡陀。砍松爲圈思擒虎。鑿領成田便種禾。岸下停舟妨亂石。磴前躡屐挽修羅。不知如此荒寒趣。比似銷金湖若何。夜眠只合在深溪。月黑巖高望已迷。但見峯頭爭上下。偶因斗柄認東西。舟人寄碇先尋夢。山鬼驚燈或暗啼。且掛風帘護紅燭。小瓶春色看棠梨。東甌國在海山邊。十里江城萬井煙。已見颶風傾蔀屋。誰平鯨浪駕樓船。三盤島嶼參差出。百粵帆檣雜

還連。豈似登州高閣上。碧環千里接遼天。

將由溫州至台州過雁蕩山前一日宿扶容村

一行分兩戒。其南極雁蕩。重壓沙海頭。險扼東甌吭。永嘉山水滋。康樂尤清放。度嶺惟斤竹。緣溪阻修嶂。天地惜靈秀。不易使人覩。及其終難祕。疏鑿任靈匠。已勒大通碑。更示詎那相。坡公遊山分。去聲平生頗自仗。惟以詩酬圖。未足供跌宕。龍湫百二峯。吾耳久知狀。竊疑形容者。奇幻言或妄。今春渡甌江。百里山海壯。且投村屋宿。行李聊摒擋。吾徒侈清遊。一飯若轉餉。損之又損之。勞費已莫償。惟願明朝晴。風谷動清曠。同行若春雁。斜向峯頭掠。懸知今夜夢。先受山靈悅。

曉同江補僧錢可廬大昭蔣竹塘調張農聞彥曾方湛匡溥何文伯孫錦諸友暨家叔載陽齊樂清竺令尹雲彬過四十九盤嶺至能仁寺

曉程將何之。四十九盤嶺。嶺高盤愈仄。曲折若修綆。肩輿未及上。相顧色已驚。陵緬惑回棧。心怯息尤屏。不登丹嶂高。安見海天永。白雲翳人目。初陽生樹影。度嶺入深谷。倏忽闢靈境。譬若讀古書。艱難驟難省。至於入之深。道指乃可領。行行至招提。幽籟泛虛靜。中懷既已平。泉石生春冷。

大龍湫歌

山迴路斷溪谷窮。靈湫陰闕龍所宮。眼前無石不卓立。天上有水皆飛空。飛空直落一千尺。鬼神不任疏鑿功。絕壁古色割爾破。山腹元氣沖然通。有時靜注絕不動。春陽下照神和融。有時飛舞漸作態。已知圓嶂生微風。一甌春茗啜已盡。水花未散猶復搖玲瓏。颯然乘颺更揮霍。隨意所向無西東。不向尋常落處落。或五十步百步皆濛濛。豈料仙境在。人世誰作妙戲惟天公。雲煙雨雪銀河虹。玉塵冰縠珠簾櫳。萬象變幻那足比。若涉擬議皆非工。石門飛瀑已奇絕。到此始歎無能同。惟有天柱矗立靜湫中。屹然百丈與此爭雌雄。

常雲峯

怪石立孱顏。濃雲常在山。翻疑碧峯走。出沒白雲間。雲氣無時盡。此峯終古閒。遙知滄海上。認取掛帆還。

寄雁蕩

我聞雁蕩波連頃。卻在最高峯上頭。雲裏龍鱗接煙水。泥中鴻爪識春秋。欲攀危磴千層去。難向深山一日留。果有經行古尊者。擲詩還使逆波流。

過馬鞍嶺

林薄無疎影。川谷莽回互。崖轉得新蹊。已惜忘舊路。延緣入東谷。狹嶺詎可度。盤磴引高情。飛泉入危步。停策如據鞍。雙谷兼盼顧。沉雲散靈風。萬石盡豁露。伽藍遠撲地。蒙茸翳春樹。宿心既申寫。景物相昭遇。

徘徊下層巒。崱嶭難久駐。

卽景

毛竹青陰日影遲。亂飛鸚鵡拂晴絲。杜鵑花發松花落。正是山田秀麥時。

淨名寺蔬飯

石色峯峯變。溪聲步步斜。樓閣圍野屋。杉竹隱春花。入寺聽詩板。穿林刷筍芽。鐵盂香稻飯。匙上有雲霞。

試雁蕩山茶

嫩晴時候焙茶天。細展青旗浸沸泉。十里午風添暖渴。一甌春色鬪清圓。最宜蔬筍香廚後。況是松篁翠

石前。寄語當年湯玉茗。我來也願種茶田。

湯顯祖云。雁蕩山種茶人多姓阮。

登靈峯望五老靈芝諸峯

春陽已西頽。遊者殊未倦。複谷窅以深。羣峯闐然見。參差各離立。戍削盡成片。巖峯忽中空。直罅裂如綫。凌厲出林表。蟠逕將升輒。三休始及上。九折石猶旋。當門飛冷泉。入腹抗高殿。虛牝喧聲聚。陰森和候變。奇觀意已驚。靈跡情彌眷。頗知吾去後。定復來期羨。

度謝公嶺望老僧巖

謝公慧業早生天。展齒曾經到嶺前。峯上丈人猶化石。不知成佛更何年。

遊石梁洞洞深可容千人石梁亘其外

古洞空山腹飛梁駕洞門橫空規日影分罅夾雲根仰險危將墜探深響易奔操蛇神若至應有夜光屯
石門潭

蕩陰雙閣水齊向石門東淺瀨平春浪澄潭受遠風晚潮歸海綠落日滿山紅回首三重嶺都藏雲氣中
出山宿大荆營

堠旗遙見大荆營麥隴茶田取次平斤竹澗通新驛路石門潭抱小方城沙邊落日監輿穩渡口春風畫
角清今日郵籤促塵鞅他年重與細經行

小窗

小窗紗影細如煙窗外蕉林綠滿天鸚鵡乍鳴茶半熟醒來方悟挾書眠

咏鐵拄杖

瘦蛟飛舞蟄龍愁六尺錚錚敵佩鈞曾伴古仙登葛嶺合依衰將住并州氣寒斷不因人熱骨重何能繞
指柔若是樂全生日鑄已隨銅狄較春秋

與興化顧藕怡仙棧遊山卽題其詩稿一絕

湖光山色上吟衣幾日閒遊便欲歸歸去詩情更何許清晨登隴看雲飛

題謝侍御振定金焦夜遊圖

北固風雲靜此宵。詩情酒興落金焦。江聲夜滿松寥閣。月色寒深玉帶橋。縹緲一帆孤掠雁。蒼茫雙寺共乘潮。舊遊我亦披圖見。十載鄉心向海搖。

予在山左畜一馬甚駿。馳驅齊魯。動致千里。及至浙。出必以舟。不施鞍勒者輒浹旬日。柔脆以死。詩以惜之。

腐儒豈是九方歟。負爾昂藏六尺身。空使湖山埋白骨。未從秦楚踏黃塵。懸金難得無雙士。裹革從來有幾人。我本將家羞墮武。敝帷零落下檀輪。

題王蘭泉司寇題三泖漁莊第七圖

捕魚老屋三泖邊。一圖題詠五十年。英辭妙繪滿湖海。流傳半在吾生前。先生作圖髮初冠。七十手辭白雲案。剡溪特賜賀知章。不是經秋憶張翰。當年七子重三吳。已詠漁莊第一圖。輞水才人猶未第。草堂十志早傳盧。星廬特奏相如賦。從此漁莊不能住。鳳皇池上早朝來。五柞宮前秋獵去。忽與嫖姚西出師。上通井絡下昆池。盾鼻飛磨露布墨。弓衣細織簫鐃詩。每當鐵馬金戈日。卻念綠簑青箬時。還朝顏色動天子。岳牧親民南奉使。雲生蠶澤雨成霖。門對溟江心似水。皋陶颺拜復賡歌。從古詩人西部多。久居臺省劉祥道。舊狎煙波張志和。釣艇歸來殊未老。手結香茅向圓泖。東都經訓鄭司農。堂下羅生書帶草。泖中

人是畫中人。千首新詞七尺綸。淞水風前蓴菜冷。江南雨裏杏花春。先生來踐西湖約。第七圖詩屬我作。
楊鐵篴鐵篴吹雲過塔山。
居柳上小蒸曬網成邨落。
曹雲西隱居柳上作小蒸圖但寫閒盟鷗鷺身。誰知曾畫麒麟閣。我亦家居甓

社湖。往來蹤跡惟樵漁。弱冠登朝謁蒲楊。
公京邸蒲楊山房。乃歸愚宗伯書第。似公早歲逢歸愚。暮年若許歸湖曲。學畫漁莊到七圖。

張子白同年。攜瑋石翁畫至杭州。展讀於定香亭上。是時池荷怒發。盆蘭襲人。把酒論詩。極一時清興。題詩記之。

蓮花過雨清宜晝。蘭箭臨風韻似詩。記取丁年秋七夕。定香亭上晚涼時。

七月十一日同人過西湖晚泊湖心亭看月

湖心有客夜停船。白露如煙月滿弦。風裏雲霞無定色。水中星斗落高天。直愁銀漢浮身去。惟見金波著地圓。亭是月中仙樹影。四圍虛湛玉輪全。
座中仙侶認瀛洲。一片清光共舉頭。極浦荷花騰夜氣。出懷詞筆破涼秋。人因地勝方能聚。景是天開恐易收。來有浮雲歸遇雨。二更霽色爲君留。

海寧安瀾園雜詠

修竹影風淪。清意每相媚。秋逕有人來。颯然破空翠。

御題水竹延清

老竹露花垂。新竹風梢亂。莫聽琳琅聲。微妙在鼻觀。

御題筠香館

叢桂抱幽亭。秋香聚圓谷。懸知昨夜晴。明月三更足。

天香臨

小閣據木末。千花向閣開。不知出花上。花底看人來。

羣芳閣

窗前十畝池。月出定滉漾。今宵難待月。金波入清想。

漢月軒

陂陀易留人。頗可釣寒碧。雨餘秋水深。又沒一層石。

碣石磯

風來月復到。吟弄當如何。我不識禪理。惟知張志和。

烟波風月

雲生竹趣深。雨歇荷香定。有客放舟來。風蟬動涼聽。

竹深荷淨

虛庭雜花樹。料此宜春宵。笙歌初散後。滿地花影搖。

和風皎月

癯叟說青籐。籐古叟尙幼。竭來八十年。入秋更堅瘦。

古籐水樹

乘興每登樓。坐見芳林杪。寶思發春華。高情屬雲表。

樓藻

石徑滑蒼苔。危欄四面開。何人要脚健。直上此亭來。

亭翠微

八月望後至海寧州登海塘觀潮

錢塘江潮秋最巨。未抵鹽官十之五。我來鹽官塘上立。月初生。霧日蹉午。江水忽疑不敢東。海口哆張反西吐。潮不推行直上飛。水不平流自僵豎。海若憑陵日再怒。地中回振千雷鼓。馬銜高坐蛟鼉舞。拔箭倒發錢王弩。須臾直撼塘根去。搖動千人萬人股。如捲黑雲旋風雨。如騁陣馬鬪貔虎。如陰陽炭海底煮。如決瓠子不能禦。三千水擊徙滄溟。十二城隍倒天柱。氣欲平吞於越天。勢將一洗餘杭土。吁嗟乎。地缺難得媧皇補。大功未畢悲神禹。此是東南不足處。豈爲區區文與伍。滄海桑田隔一堤。魚鼈竊首相鄰處。我皇功德及環瀛。親築長防俾安堵。全用金錢疊作塘。不使蒼生沐鹹鹵。邇來龜赭漲橫沙。卻指尖山作門戶。雁齒長椿十萬行。魚鱗巨石三層礎。王充論前有古蹟。枚乘發後無奇語。吁嗟乎。此塘此潮共千古。詞人心樂帝心苦。

秋桑

吳興桑田之多。與稻相半。丁巳八月下旬。按部至此。西風落葉。騷騷然有深秋意矣。因成四律。以邀和者。且以此課郡中詩士。

扁舟衣袖乍驚寒。下若桑林綠意殘。初響天風知半落。未逢夜雪已先乾。樓前有日蒼涼出。陌上無箏錯雜彈。若使秋胡今駐馬。黃金原向絹機看。

西河古社重徘徊。木葉應知庾子才。淇水秋期貧婦怨。晉廷九月餓人來。采菱纖手空成妒。舞柘輕腰不共迴。偏是吳儂感憔悴。十年牆下記親栽。

底須三宿問他鄉。誰向花前笑索郎。釀秫時光宜薄醉。調弦情緒動清商。但教天下輕綿暖。何惜林間墜葉涼。試種東坡三百尺。芟來終比暮春長。

漁陽八月已空枝。還是吳興霜露遲。飛鳥雨晴猶護羽。野蠶風定向懸絲。遠揚試伐深秋後。光景能收落照時。料有苕溪老桑苎。垂虹秋色滿新詩。

題道場山歸雲菴孫太初墨蹟卷後

卷中有文董諸名公數十人書畫

山人化作秋雲飛。吳山松冷雲初歸。草菴白塔不能到。惟見白雲翻夕暉。去年道場山上去。杖策直叩枯禪扉。聽詩頗有古錦版。侑茶不用黃金徽。今秋移文入山去。直取采雲來棘圍。滿堂賓客共翦燭。把卷羣歎所見稀。

以文入山向僧取卷留文爲券題畢乃交付以防宵吏匿竊

山人詩翰清似鶴。華陽真逸猶嫌肥。後來過客五百載。縑楮半爲山

人揮。蒼煙過眼月露溼。疑有雲氣沾人衣。此卷不可染塵俗。送爾以詩歸翠微。

謝蘊山前輩啓昆自南康遷居南昌。別業有池。翁覃溪先生名之曰蘇潭。先是覃溪先生視學江西。

曾名南康蘇步坊之井曰蘇潭。故蘊山前輩即以自號。且繪蘇潭圖屬題。

先生清望似蘇公。小住南昌別業中。自有謝墩任人奪。卻將蘇步與師同。

翁爲謝之師

百弓小圃堪盤鶴。半畝

方塘好印鴻。爲乞新詩壓圖畫。瓣香先寄北平翁。

蘇齋久已入詩談。更與西江水共參。

坡公江西詩曾用馬祖語

學士坊邊新改井。先生溪上舊師覃。論交白髮清同照。若

雨蒼生味定甘。五百餘年書卷尾。恐將終號謝公潭。

題凌次仲教授

延堪校禮圖次石君師詩韻

周儀治天下。厥功逾誓誥。揖讓升降中。精義靡不到。吾友凌經師。無雙齊許號。綵最容臺上。不受介紹導。既有戴聖學。且持高密操。志氣堅不撼。精力滿無耗。弱冠我同游。許我入堂奧。嚶嚶兩鳥鳴。頗異凡味噪。實事必求是。虛聲共恥盜。君之入京師。以禮爲履蹈。始知士相見。盡化頑與暴。北海一席間。驚譽馳四壘。惟知抱一經。不願駕雙鷺。宣城冷官舍。校禮志雅好。昌黎所苦讀。而君力排纂。經文溯江河。疏義析潢潦。得間發一難。皇慶賈公彥。不敢報。餘情述周髀。知天若裨竈。重輪引虛綫。測視目無眊。淺儒襲漢學。心力每浮躁。豈知后與慶。家法傳衰耄。凌君發禮例。楊復李如圭。不屑冒金輔之程。易田及劉端臨。盧召弓。相視互不傲。邇來文更雄。魏晉力能造。始歎才之奇。實惟天所肅。吾師極重才。愈奇愈憐悼。新詩榮于褒。華袞被單綯。制科儻三舉。會見交章告。翹然賁弓車。豈徒離席帽。平生學何事。許國敢悵悵。辟雍仰天藻。詎

止泮芹芼。吾才陋且小。地褊若滕郛。與君素投分。又若邱與瑄。同在文公門。籍湜各樹纛。親老修天爵。斯言昔所禱。君今潔白養。恩勤慰孀。已勝饑驅時。負米比轉漕。手此十七篇。怡然志無懊。天將厚其後。茲特先章牘。所以吾師詩。披圖深勸勞。

寧經室四集詩卷四

戊午

上元後一日春讌和謝蘇潭方伯韻

月輪還見十分圓。金綺餘情不夜天。鐙色照開花苑外。歌聲飛過彩雲邊。民騰善氣春如海。官有清聲酒亦賢。同是南江持節者。共將歡慶祝堯年。

天爲人和每放晴。望舒偏向小園盈。春生北海賓朋坐。詩帶東山絲竹聲。半月閒心疎簿領。一時仙吏話蓬瀛。同宴九人。皆以京朝官外任者。東風八律鯨波靜。玉燭先調十二城。

五更過蘇隄列炬中見桃柳正妍

清鐘動疏櫓。缺月猶在天。山光餘夜碧。湖水生春煙。春煙約微風。飛落蘇隄邊。你騎青驄來。暗柳拂絲鞭。行燈一路明。照見桃花鮮。譬如蓬島夜。綽約棲羣仙。燭龍啓潛蟄。驚起仙人眠。尋常春夢濃。日影移花甌。今宵破春曉。醒在羣花先。東方雲漸白。六橋虹影圓。不惜沾衣露。濕紅殊可憐。

半山桃花十餘里春仲偕人兩次來游元和蔣蔣山

徵詩。

武進陸祁生

繼略。

陸紹聞

繼遜。

皆有圖詠紀

事因題冊中